

A JE' JU'UNA', PACHIR CAJ U CA' TS'IBTA JUAN

2 JUAN

Jach taj a C'ujō' u yajo'onex

¹A je' ju'una', raji' cu ts'ibtic Juan, a mac tuchi'ta'b ten Jesús uch. Tan in ts'ibtic u ju'unin ti' tech xquic, a mac in jach yaji'. Baxuc a techo' teta'anech ten C'uj. Baxuc xan, quin ts'ibtic ti' a pararob. MΛ' chen ten in yajechi'. Tu cotor mac a yer C'ujō', cu yajquintiquechex. ²Rajen quin yajquintiquech, quire' yΛn to'onex u t'Λn C'uj tij corex. Ti' yΛn u t'Λn C'uj tij corex munt q'uin. ³A teno' in c'at ic Tetex C'uj yejer ic Jaj Ts'urirex Jesucristo ca' u yirop otsiro'onex. In c'at ic Tetex C'uj yejer ic Jaj Ts'urirex Jesucristo ca' u yamto'onexob an ten bic jach manan tsoy tu t'Λnob C'uj. In c'at ic Tetex C'uj yejer ic Jaj Ts'urirex ca' qui'ac ij corex ten ti'obo' soc mΛna' ba' quic tucriquech. A ra' yΛn to'onexo' a mac a taj tu yacsaj tu yor a tan u pacran yajquinticob u bajob.

⁴Jach nequi' in wor caj in wu'yaj jun yarob a pararob cu quibicob u t'Λn C'uj. MΛ' ja wirej, baxuc caj u

toc araj to'onex C'uj ic Tetex uch, ca' ij quibex u t'Λn. ⁵A teno', quin chich c'atic tech chan xquic, in wet acsΛ'orirech. Baje'rera', quin chich c'atic tech ca' ic pacran yajquintex ij quet acsΛ'orirex. A je' t'Λna', a quin ts'ibtic techex, ca' ic pacran yajquintex ij quet acsΛ'orirex. MΛ' ric'ben t'Λni', quire' ta toc u'yex caj a wacsex ta worex uch. ⁶Ca' ij qui' u'yex a ba' ara'b ten C'uj. Ra' u c'at ya'aric to'onex, ca' ic pacran yajquintex ij quet acsΛ'orirex. Ra' ta wu'yex caj a yΛn acsex ta worex uch ca' manaco'onex an ten bic winic a cu yajquinticob C'uj, baxuc xan, a cu yajquinticob u yet acsΛ'orirob.

Yajtusirob mac

⁷Quin c'asic techex ca' a wu'yex a ba' caj u ya'araj to'onex C'uj uch. Ti' cu man tu yΛnechex a cu tus aricob techex, yajtusirob. Cu man u tus a'arej tu cotor mac. Cu tus manob ya'arej: "MΛ' jach tar u bΛq'uer C'uj caj tar Jesucristo." Aro' yajtusir mac, bayiri' cu p'acticob Cristo.

Yan ya'ab baxuco'. ⁸Qui' canant a bajex soc ma' a satiqueux u bo'orir a beyajex ti' C'uj. Qui' canant a bajex soc a c'amiqex u qui' nup'ur u bo'orir a beyajex ca' bin xiquechex acatan ich C'uj.

⁹A mac a caj u jenmastaj u t'an C'uj a ma' cu p'atar ti' u t'an C'uj a ba' camsa'b ten Cristo uch. Raji' ma' yer C'uji'. Barej a mac cu p'atar ti' a ba' camsa'b ten Cristo uch. Raji' yer C'uj, ic Tetex. Raji' yer xan u parar C'uj. ¹⁰Wa cu tar mac tu yanechex quir u tus camsiqechex u t'an C'uj. Chen ma' ju camsechex a ba' camsa'b

ten Jesús. Ma' tsoy a wacsiqex tu yanechexi' ma' tsoy a t'aniqex xani'. ¹¹Ma' ja wirej, wa ca t'aniqex ca yamtiqex ti' u c'asir a ba' cu camsico'onex.

Tabar u ts'ocar u t'an Juan

¹²Cax yan ya'ab in t'an quir in ts'ibtic techex ich ju'un. Chen ma' in c'at in ts'ibtiquechexi'. In c'at soc ca' tsicbanaco'onex soc jach qui' ij corex.

¹³U pararexob a baj a xquic a teta'b ten C'ujo' caj u ya'araj: "In qui' t'aniqechex." Jeroj ts'oquij, quij Juan.